


MUSHAKULU ABULAHAMA

 Buuku wa Ntendekelo ne jikwabo, kyapitala kyabu 22, kutatwila na veeleshi wabu 15, kabiji twaketekla kwambatu pa bimye bicheche ne kutatula mwingilo. Ntendekelo 22, kutatwila pa veeleshi wabu 15.

Kabiji malaika wa YEHOBA wamwichile Abulahama kufuma mwiulu kimye kya bubiji,

Ne kwamba mba, Nechipa Amiwa mwine, byo byaamba YEHOBA amba byo wauba kino kintu, kyakubula kukana kupana mwanobe, yenka umo ye uji nanji:

Kine mu kupesha Nkakupesha, ne kuvuzha Nkavuzha lukunwa obe nobe tubaangabanga twa mwiulu, kabiji pamo nobe musenga wa ku kitulu kya kalunga ka meema; kabiji ba mu kisemi kyobe bakeyangata mizhi ya balwanyi babo ke yabo;

Kabiji monka mu ba mu lukunwa obe mo mo bakatambwila mapesho ba mu mikoka yonse ya pano pantanda; mambo wakokela jwi jami.

² Ing'anyi mulaye, mambotu alukokelo! Lukokelo kyo akeba Lesa. Kimye kimo kyaambiwe mba, "Lukokelo lwawama kukila kitapisho." Kukokela Nkambo kyakila kuwama kukila kitapisho kyo wafwainwa kuuba.

³ Twatalang'ana nakyo kibaba kyabaya bingi, bufuku buno, *Mushakulu Abulahama*, ao watelelwe mba "shanji ba Lwitabilo," mambo Lesa wamulaile mba ukaswana ntanda, ne Lukunwa wanji. Kabiji ke kupichila mwi Abulahama atweba, byo twafwa mwi Kilishitu, twaikala ke Lukunwa wakwa Abulahama kabiji bakuswana pamo Nanji monka mwaila mulaye.

⁴ Pano, Abulahama wajinga muntutu, kechi wajingapo wapusanako na bantu bakwabo ne. Lesa kechi wamwichile ne, nobe byonka byo tuji na byanembwa, poso byo afikile pa myaka sebetefaiwi. Mukazhi wanji, ao wajinga nyenga yanji, wajinga na myaka sikisite-faive pa kyokya kimye, abo kape baikela pamo kufumatu ku bwanyike bwabo. Kabiji wajinga ng'umba, kabiji kechi wajinga na baana ne. Lesa wamwichile ku lwabano lwapwijijika, kwiabanya aye mwine kufuma ku ntanda yonse, kabiji ne ku bantu banji bonse, kabiji ne kufuma ku balongo banji bonse. Kwajinga kintu kimo kyawaina kyo afwainwa kuba.

⁵ Kabiji umvwe Lesa wakuketekela mba kubapo kintu kimo kyapusanako, Aye ukeba lwabano lwapwijijika kufuma ku luzhinauko lonse. Obewa wafwainwa kwikala walukokelo

Iwapwijijika, Iwa kukokela byo Aamba. Lesa wikikeba. Obewa kuuba wikyubila mu jishinda jikwabo ne. Kabiji, pano, Aye kimye kyonse wikala kya kumwenako, kabiji akya kyajinga kya kumwenako Kyanji, kya lwabano lwakufuma ku kisemi kyanji kyonse, bonse ba mu balongo banji, kabiji ne bikwobotu, kwenda bumi bwa abenwa Lesa.

⁶ Myaka yapichile, kafwako nangwa kimo kyamwekele ne, nangwa byonkabyo Abulahama wakwachijiletu. Aye kechi wafumishemo luketekelo ne. “Aye kechi wazhinaukile milaye yakwa Lesa kupichila mu kubula lwitabilo ne, pakuuba wajinga wakosa, kasa atakaika Lesa.”

⁷ Mwaka pa mwaka, byo bailenga, kechi paji luzhinauko ne bavula bakajimbuluzhi baishile na kwamba mba, “Abulahama, shaanja mikoka, baana baanga bo uji nabo pano?” Akyo kechi kyamulengejile kwikala waluzhinauko ne. Kwakubula mwaana, kabiji Sala wapichile pa kimye kya bumi, kya kusema baana, mambo, wapichile pa kikye kya bumi bwa bainetu, bino nangwa byonkabyo Abulahama waketekejile Lesa. Aye winengezhenga kutambulwila mwaana, mambo aye wayukile mba Lesa kechi wakonsha kulaya mulaye Ye akonsha kubula kufikizha ne.

⁸ Lukunwa Wanji wafwainwa kulanguluka kintu kimo. Nangwa kyamwekelenga nobe kechi kyakine ne, byo kyajinga kyabula kufikilamo mwaila kisemwa ku milanguluko ya bumuntu, nangwa byonkabyo Lesa kechi wakonsha kulaya mulaye ao Ye akonsha kubula kulama ne. Twaketekela kyokyo kintu kimo leelo. Yense Lukunwa wakine wakwa Abulahama waketekela kintutu kimo. Nangwa kikaletu kya mung’anyi musango, nangwa twikale na maana avula byepi, nangwa bintu byavula bimwekanyike byepi, byo kyaikala kyabula kufwainwa ku maana a bu muntu, kyaikala kyabulamo maana, nangwa byonkabyo, ku milanguluko ya bu muntu, kechi kipanapo lupusano nangwa luchechetu ne. Inge Lesa ye wikyambile, abyoyokiji. Kabiji Lukunwa wakwa Abulahama waikele pa ABYO BYOBYAAMBA AYE NKAMBO. Akyo kyapwisha byonse.

⁹ Twatana kuuba mba, pa myaka tweti-faivi palutwe, kafwako baana ne. Kabiji nangwa byonkabyo Lesa wajinga wakishika ku mulaye Wanji kwi Abulahama, mambo Abulahama waketekejile Lesa. Awa nsongwalume mucheche waishile kutanwako, nobe Izaka.

¹⁰ Pano panyuma ya kwiya kwa Izaka mucheche pakyokya kifulo, nanchi twatana kuuba mba Lesa wamupele kwesekwa kubiji. Aye waambile mba, “Awe mwaana...” Panyuma ya kwikala myaka aduleendi fifitiini, nangwa tweti, Abulahama byo ajinga. Aye waambile mba, “Nasaka namba obewa usende yuwe, mwaana obe yeka umo, ne ku mutwala ku mutumba ye Nkakumweshwa, kabiji konkwa ukamupane, payuwe mutumba, bu kitapisho.” Mu mulaka mukwabo, konauna bukamonyi buji

bonse bo ajinga nabo amba mulaye wafwainwa kufikizhiwa. Akyo kibena kufumyapo bintu byonse bya ku mubiji.

¹¹ Kabiji Abulahama waambile mba, “Namutambwile nobe umo wafuma mu bafu. Kabiji Amiwa nashininwa mba Aye wakonsha kumusangula kufuma ku bafu.”

¹² Abo ke bantu pakino kimye Lukunwa wakwa Abulahama, mambo Aye witusangula kufuma ku bafu. Atweba twafwile mu bubi ne mu mizhilulwila. Kabiji Aye Wakonsha kupipula milanguluko yami, pipulai milanguluko yami, pipulai kiseumwa kyami, pipulaitu kyonse, Aye wakonsha kuuba monka mo Kyamutokela ku muchima. Kyonse kyo Aamba, Naketekela mba kya Bukine, kabiji yense Lukunwa wakwa Abulahama waketekela kintutu kimo.

¹³ Abulahama, kechi wajinga wabula lukokelo kwi Lesa ne, wasendele nsongwalume mucheche. Kabiji lolwa lukeelo, wabuujile bakalume mba, “Anweba pembelelai muno na bamyule. Kabiji mwaana ne Amiwa ntusakuya kokwa na kupopwela, kabiji aye ne Amiwa tusa kubwela.” Oo, aye wakonsha kwikyuba byepi? Inge waya peulu ya mutumba, na konauna aye mwine bumi bwa mwananji, nangwa byonkabyo aye waambile mba, “Mwaana, mwanyike ne Amiwa tusa kubwela.” Aye wayukile mba kintu kimo kyafwainwa kumweka. Kabiji aye kechi wayukiletu Lesa byo akeyyua ne; ajo kechi jo jipuzho jaji ne. Aye wayuka mba Lesa wikilaile.

¹⁴ Abyo byo byonka byo tutako muchima kuyuka, Lesa wikilaile! Pano kikekala byepi? Amiwa kechi nakonsha kwimubula ne. Bino Lesa ye wikyambile! Aye ukatuma Yesu Kilishitu, mu kimye kya bubiji, Aye ukeya mu musango wa bumuntu. Aye ukasenda ba Kwanji Mwine. Kukekala myaka kiumbi kimo, myaka kiumbi kimo mu bumfumu pano pantanda, ne Aye, na bakulwa. Abyo Aye byo alaile, kabiji tubena kupembelela kyokya kimye kufika.

¹⁵ Aye walaile kubuka bakolwa, kusangula bafwa, kupangamo bademona. Aye walaile kwikyuba. Aye ujitu pamo keesha, leelo ne myaka yonse. Ibyepi? Amiwa kechi nayuka ne. Aye walaile kwikyuba! Atweba twikiketekela; akyo kyapwisha byonse. Inge muntu waketekela Lesa, aye uketekela byonse byo Aamba.

¹⁶ Kabiji ajo jo jishinda Abulahama jo aketekejilemo Lesa. Pano bamwipwizhe konauna bukamonyi buji bonse bwa kuuba mba mulaye Wanji yense wafwainwa kufikizhiwa, bino aye washinijilwe mba Lesa wakonsha kwikyuba.

¹⁷ Pano, Aye kechi wapainetu yenkawe mulaye mukatampe ne, Aye wamupaine ne ku Lukunwa wanyi, ne apo. Kabiji mambo Abulahama wajinga wakishika, kabiji walamine akya—akya Kyambo kya Lesa akyo Lesa kyo amulaile, kabiji wayukile mba Lesa wakonsha kusangula ayuwe mwaana. Kabiji aye kechi wakainye mwananji ne; bino (Lesa) wajinga kipasha kya Lesa

wapaine Mwaana Wanji, nangwa byonkabyo; byo asendele kunyi popa peulu ya mutumba, ne bintu bikwabo; nobe Kilishitu byo asendele musalabu wa kitapisho Kyanji Ayemwine, kuya peulu a mutumba, kuya konka ko Bamupopejile.

¹⁸ Twavuluka mba mu kikye, pa kuuba kikye, kyamutokeshe Lesa pa muchima pakumona Abulahama byo Amutemenwe kukila pa byonse biji pantanda, ne mwanajitu yense. Aye Wamutemenwe kukila pa byonse byakonsha kwamba muntu, byo akonsha kuuba muntu, aye wamutemenwe Lesa kyakuuba mba waketekejile Kyambo Kyanji.

¹⁹ Yense Lukunwa wakwa Abulahama waketekela mba Lesa uji muyewa musango. Abo baketekela Lesa. Kabiji twayuka mba kyamutokejile Lesa pa muchima kyakuuba mba abye byo byo Aambile, “Lunkunwa Obe ukangata nsakwa ya balwanyi banji. Lukunwa Obe ukangata nsakwa ya balwanyi banji.” Vulukai, abyo BYOBYAAMBA AYE NKAMBO. Lukunwa wakwa Abulahama waketekela kyokyo. Inge wi Lukunwa wakine wakwa Abulahama, alwa lwitabilo lwajinga ne Abulahama mwi Lesa, luji mwi obewa. Kabiji mwaketekela mba Lesa byo aamba, Lesa ulama mulaye Wanji.

²⁰ Kabiji Aye wikyambile, pano vulukai, Aye walaile yuwe mulaye kwi Abulahama panyuma ya Kumupa lweseko. Awa Lukunwa wa kwa Abulahama wafwainwa patanshi kwesekwa, mu kumona kana kine waketekela Kyambo. Vulukai, jishindatu jimo jo akonsha kulaminamo mulaye wakwa Lesa, mambo aye waketekejile mulaye wakwa Lesa, kabiji waesekelwe kana Wamuketekejile nangwa ine.

²¹ Twaletwa ku lolwa lweseko. Awa Lukunwa wa Abulahama, leelo, waletwa mu lweseko. Bushe tusa kusenda Kyambo kya Lesa, nangwa kusenda kyaambile muntu pa Kikye? Bushe twakonsha kusenda lufunjisho lwalengwa na kabungwe kamo, kabiji ne kuswa kyokyo, nangwa twakonsha kusendapo byaamba Lesa? Inge Kyambo kya Lesa kyakine, twaketekela Kyambo kya Lesa, nangwatu bintu bikwabo bikale byepi. Tuleka kyambo kyonse kya muntu kyaikala kyabubela, kabiji kya Lesa kikale kya Bukine. Awa Lukunwa wakine wakwa Abulahama! Bino kasa ukyangye kwikala awa Lukunwa wakine, wafwainwa kupita mu kwesekwa, nobe byonka byauble Abulahama, aye mwine. Aye kechi walaile konka kwi Abulahama ne, pakuuba ne Lukunwa wanji naye ukangata nsakwa ya balwanyi. Oo, ami!

²² Pano ngilangulukaitu, awa mushakulu wajinga washininwa mu kikye, mu lweseko lwanji lwa mulaye wa Kyambo kya Lesa, wajingatatu bulongo. Nangwa kikaletu kya musango ka, aye wajingatatu waketekela mba Kyambo kyajingatatu bulongo. Aye Abulahama, awa mushakulu mukatampe, kechi wibwelelemo mu lwitabilo ne, byo aletelwe ku kyokya kimye kya kwesekwa. Aye waketekejile mba Lesa wakonsha kumusangula kufuma ku

bafu. Aye wikiketekejile, mambo Lesa ye wapaine mulaye. Kabiji Lesa kimye kyo apaine mulaye mba ukekala “shanja mikoka ya bantu,” kabiji aye waketekejile mba kiji byonkabyo. Aye kechi wayukile byo kikekala ne. Kimye mwaana kyo aishile, panyuma ya kuketekela, myaka tweti-faivi, kabiji waipuzhiwe mba onaune mwaana, aye watwajijiletu na kuyuka mba mulaye wakwa Lesa wajinga wa kine, kabiji wapaine mwaanani.

²³ Lukunwa Wanji, kintutu kimo! Mulaye wakwa Lesa ke katetesho, ku booba baji bu Lukunwa wa kwa Abulahama. Mulaye ke katetesho, kufwachika kwa kamonyi. Kabiji umvwe twaketekela Kyambo kyonse kyalailwe, nanchi katetesho kapewa kwi atweba, mu kufikizha mulaye. Monai, inge atweba—inge atweba, byotuji Lukunwa wa kwa Abulahama, tupita mu lweseko nangwa tusakuketekela Baibolo, nangwa ine, aye Baibolo ke Kyambo kya Lesa, mambo Ke Lesa, kabiji panyuma yakupita mu lweseko, waketekela.

²⁴ Umvwe bamo baamba mba, “Moba abya kukumya apita,” inge mwaitaba kyokyo, akyo kyapusanako na Kyambo.

²⁵ Inge waamba mba, “Obewa kechi utambula Mupashi Wazhila ne, leelo. Kechi kujipo kintu kyamusango yewo ne. Ke batumwa twelufu bo Bamutambwijile.”

²⁶ Akyo Kyambo kyaamba mba, Petelo Wikisapwijile pa Juba ja Pentekositi, aye waambile mba, “Lapilai, anweba bonse, ne kubatizhiwa mu Jizhina ja Yesu Kilishitu mululekelo lwa mambo, kabiji mukatambula wabupetu Mupashi Wazhila. Mambo mulaye walailwa anweba, ne ku baana benu, ne kubonse banji kwalepa, ne bonse mo bavujila Nkambo Lesa wetu bo aketa.”

²⁷ Abyo kine byo Kyalumbulula. Kiji, pano inge winengezha kupita mu lweseko, lwalula lweseko lwa Lesa, ne kulondela ndoonda, Amiwa mbena kwimubula, anweba musakutana mba Lesa ulama Kyambo Kyanji, inge mwakonsha Kwikitabila. Abyo ibyo. Pakuuba wafwainwa kupita mo kyokyo, mambo ako ko katetesho; umvwe Wamutambula, nanchi obewa watambula mulaye. Mambo, Ke ndondolwelo yakwa Lesa, mujishinda jo twafwainwa kwikyubilamo, kabiji ajo jo jishinda jo twafwainwa Kwikilondela, byonka byo Aambile. Pano kechi ku bamotu ne, bino “yense,” yense waitabila, yense walapila, yense waitabila. Ke ku bisemi byonse, ku bantu bonse, yense ukeba kwi Kiketekela. Kabiji lwitabilo mu Kyambo kya Lesa kikuleta kuyuwe mulaye. Nanchi, kabiji nanchi apo ipo po wakonsha kwikala na bulume bwakutambula katetesho ka mulaye.

²⁸ Kabiji mulaye ye twatambulwila, ko katetesho, ke lubatizhilo lwa Mupashi Wazhila. Abyo ibyo. Mambo awa ye Lesa mu musango wa Mupashi, obewa byo uji Kyambo Kyanji mwi obewa, nanchi Aye wiya monka. Inge mwatambula Kyambo mwi anweba, aye Mupashi Wazhila ye yenka wakonsha

kwikilengela Kwikala na bumi, apa bino obewa uji na mulaye wa kutambula nsakwa ya mulwanyi uji yense wakonsha kuleta bulemo kwi obewa. Abyo ibyo. Lesa wikilaile, kabiji kiji byonkabyo.

²⁹ Pano, vulukai, wafwainwa kwi kyubatu, kabiji kanatu, panyuma ya kwesekwa ku Kyambo.

³⁰ Abulahama waesekelwe na Kyambo. “Mwakonsha kuketekela, Abulahama, amba obewa ukekala na mwaana?”

“Ee.”

³¹ Mwaana waishile. “Pano monaune. Bushe wakikiketekela, Abulahama?”

³² “Nekiketekela, nangwa byonkabyo, Anweba mwakonsha kumusangula kufuma ku bafu.”

³³ Kabiji panyuma ya kyokyo, Aye waambile mba, “Pano, Lukunwa obe ukangata nsakwa ya balwanyi banji.” Amena! Panyuma yakwiya kwa lweseko!

³⁴ Twayai tumonepo pa kunwa imo yakwa Abulahama, mu lukunwa wa kumubiji. Akyo, atweba leelo twi Lukunwa wa bumupashi. Bino twayai tumone, kupichila mu lukunwa wa ku mubiji, mu bamo baitabijile mulaye wapwijijika wakwa Lesa, kabiji kechi walumbu- . . . [Kafwapo bijipo pa tepu ne—Waku.]

³⁵ Naambile mba, “Mwayilatu ndoonda, kika kyakonsha kulengela nsongwakazhi Mwinakilishitu kukeba kumweshwa bya kumvwala byanji bya mukachi? Amiwa kechi nayuka mo kyaila ne.”

³⁶ Obewa wasemwa jibiji, kwi Lesa, obewa uji na buuya bwa Mupashi Wazhila bwa kumweshwa mba byo uji. Byo uji, obewa uji na bulume bwabula mu aao masiketi alengesha buvu, abyo bibyo, mwanamukazhi wakine wa Lesa, ao waimana na bulume, wafwainwa kusekwa, ne kutela musango wakala; bino obewa ujipo na kintu kimo kyo bakonsha kubula kukwatako ne, kabiji bekitaya kwakubula kwikala nankyo jibiji ne. Abyo ibyo. Anweba muji na bulume. Akyo Lesa kyo abena kukeba, ke bulume. Mwamona?

³⁷ Bino kintu kitanshi, inge mujipo jipuzho mumilanguluko yenu, kechi mwakonsha kwiyuba nangwa pachechetu ne. Kechi mwakonsha kwiya mu mulaini wa milombelo ne inge pajipo jipuzho mumilanguluko yenu. Anweba kechi mwakonsha kwiya ne kanatu kine mwikiketekela, kwakubula kuzhinauka ne, kechi kujipo luzhinauko mu milanguluko yobe, nangwa pachechegtu ne, kanatu mba musakutambula lubuko, nanchi po mukafuma ku pulatifomu muntu wawama. Abyo ibyo, inge kechi mujipo jipuzho mu milanguluko yobe, nangwa pachechetu ne. Obewa wafwainwa kuketekela Lesa, kechi bukitabila-mbijinga ne. Kine kuketekela!

38 Kabiji awa Lukunwa wakwa Abulahama wi kiketekela mambo Kyambo byo kyaamba, kabiji ao oene mambo o twikitabila. Kechi mambo akuuba mba muntu umo wakulengulula ne, mambo muntu mukwabo ye wikyambile ne. Mambo Lesa ye wikyambile, akyo kyokyalengela mba kikale Bukine. Inge Lesa waamba, akyo kyapwisha mepuzho onse. Aye ye kyambo kyapelako. Aye ye wapelako. Inge Lesa waamba kiji kyonse, akyo kyapwisha byonse. Kechi kujipo kintu kikwabo kyakonsha kwamba Nakyo ne. “Kyambo kyonse kya muntu kikale kyabubela, kabiji Kyami kikale kya Bukine.”

39 Pano nobe byo tubena kumona kunwa imo, twayai tulanguluke. Tulanguluke pa baana ba Kihebelu, Njinabo kuno, na kulanguluka pa kyokyo, pa baana ba Kihebelu, panyuma ya kwesekwa na kupopwela kikinshi. Pano, vulukai, mfumu waambile mba, “Yense usakubula kufukamina kikye kikinshi, ukataiwa mu kisha kya mujilo.” Pano, abo baana baketekejile mba Kyambo kya Lesa kyajinga kyaoloka, kyakuuba mba kechi bakonsha kupopwela musango uji yense wa kikinshi ne, bino byo bafikile pa kubekya kabiji ne kwesekwa kana bakonsha kwikyuba.

40 Kimye, bonse bashala baana bajinga kokwa batambwile ne kuya na kupopwela, bayile monka mujishinda mwaambijile mfumu. Abo bayijile mumo na milanguluko ya bavula, mba bafwainwa kwikyuba.

41 Kabiji byo baesekelwe, kana bakonsha kupopwela bakinshi kabiji ne kuzhilulula Kyambo kya Lesa, baikele bakishika ku Kyambo. Nangwatu bintu byubiwe byepi, baikele bakishika ku Kyambo. Kabiji byo bebataile mu kisha kya mujilo, mulaye wakwa Lesa wafikizhiwe. Ba angachile bizhilo bya mulwanyi wabo. Kabiji momwa mwajinga Muntu wabuna, na kii wakasulwile lubebe kufuma ku mujilo, kabiji kechi kibobilepo nangwa kintu kimo ne kanatu kwibakasulula. Amena.

42 Inge mwanamulume nangwa mwanamukazhi winengezha kutola lweseko, kwesekwa kwalula!

43 Mwamona, batwelele mu mujilo. Kabiji byo bekyubile, bajinga mu mujilo, bino kintu kyaubiwe, akye kisha kya mujilo kya kasulwile, kyafumishe mi—minyololo ku maboko abo.

44 Bimye byavula, Lesa wituleka, twakaswa posepose ku ntanda, kukaswa, Aye uleka lweseko lwa mujilo kwiya pe atweba, apo po twafwainwa kufukula byakuuba. Kabiji umvwe twauba kyokyo, kintutu kimo kwesekwa byo kwafwainwa kuuba, umvwe Lukunwa wa kine wa kwa Abulahama waimana pa—pa masanga amilanguluko, kabiji wafukula mulanguluko wanji amba engijile Lesa, wakonsha kukasulula minyololo ne kwitwalula ke baana babene. Satana wakonsha kukupa kikola. Aye wakonsha kukupa kintu kimo, ne kikwabo. Byo wafwainwa

kuyuka mba kechi Lesa wakuleta pamasanga ne, mu kumona kana musango ka wa—wa—wafukwiilo yo wafukula?

⁴⁵ Abo batambwile nsakwa ya mujilo. Awa mujilo kechi wibasokele ne. Kechi kwajingapo nangwa bwema bwa mujilo pe abo ne, mambo bayukile mba bajinga Lukunwa wakwa Abulahama, kabiji baimene kulubaji lwa Lesa ne Kyambo Kyanji. Abo baangachile ma—masakwa a balwanyi, ne mujilo kechi wibasokele ne, mambo baangachile mansakwa.

⁴⁶ Palutwe, kwajinga mwanamulume, ngauzhi konkakwa, wajizhina ja Danyela. Aye wafwaijilwe . . . waesekelwe kana aye wakonsha kwingijila Lesa umo wakine, nangwa ine. Kabiji byo kyaishile ku kyokya kimye, nangwa aye wakonsha kwingijila Lesa umo wakine, nangwa kupopwela lesa wa butunshi, aye wakaine kwikyuba; kabiji washikwile bipeze bya nzubo, ne kulomba kwi Lesa wanji, pajuba pajuba. Kabiji aye wasendelwe ku kyonka kya, ne kupewa mambo mwaila mizhilo ya ntanda, ne ku mutaya mu jiyengo ja mabokwe. Mutema wa babokwe bafwa nzala baishile kwi aye. Bushe aye waubile ka? Aye waangachile nsakwa ya balwanyi banji. Abo babokwe kechi bamujile ne. Lesa watumine Mumbulungwa wa Mujilo, Malaika waimene pakachi kanji ne bonkwe.

⁴⁷ Aye waangachile nsakwa ya balwanyi, mambo aye waesekelwe kumona kana wakonsha kumpopwela Lesa umo wakine, nangwa kwikala na balesa bavula ba butunshi bakupopwela. Nanchi aye waimene mulweseko, kabiji waangachile nsakwa ya balwanyi. Bokwe kechi wamukwachile nangwa pachechetu ne, mambo Lesa wajinga nanji. Lesa mulaye wanji wajinga wakishika, mambo aye wajinga Lukunwa wakine wakwa Abulahama.

⁴⁸ Mosesa, oo, mukwabo mukatampe. Aye waesekelwepo, ne aye, mu kumona mulaye Lesa ye amupele. “Amiwa kekala nobe inge waya konka.” Kabiji byo aimene ku meso aba kipashanya ba kya bupe kyanji, Yanesa ne Yambalesa baesekele kwimana ne kupashang’anya kyonka kintu Mosesa kyo bamukambizhe mba obe. Kabiji Lesa wamwichile, kabiji wayukile mba iye wapelwe mwingilo wakuuba kikye, kabiji aye waimene ne kuuba kyakukumya Lesa byo amubuujile mba boobe. Kabiji bakupashang’anya baimene, na kuuba kintu kimo, bino kechi kya mukatezhe Mosesa ne. Aye waimene wakishika ku Kyambo kya Lesa, kabiji waangachile ma nsakwa, amena, ya balwanyi, mambo akuuba mba waimene wakishika ku mulaye wa Lesa, nangwatu ing’anyi waeseka kwi kipashang’anya.

⁴⁹ Ke lufunjisho lukatampe bingi ku Mwinakilishitu yense! Inge mwakeketa mwamona kafutufutu, mwafwainwa kuvuluka mba ubena kweseka kupashang’anya kintu kituntulu. Bino, akyo kyalumbululatu mba kuji umo wakishika. Imana wakishika ku Kyambo kya Lesa! Nangwa kikale kyamusango byepi, lamaitu

mulaye Wanji. Ee, Danyela waikele wakishika ku Kyambo kya Lesa.

⁵⁰ Nangwa bavule byepi baesekelenga kumupashang'anya aye, ne bintutu bikwabo, waikele wakishika. Kabiji aye wayishile na mambo akintu kimo, pakuuba mba alupule Isalela kufuma mu Ijipita, ne kwibatwala mu ntanda yamulaye. Kabiji byo kyafikile kimye kya kuya mu ntanda ya mulaye, kufuma mu Ijipita, kwaimene Kalunga Kabafu mu jishinda. Kabiji aye waangachile nsakwa ya meema, ne nsakwa yashikukile. Kabiji aa—aa meema abwelele lunyuma, ne Mosesa wasendele Isalela mungyetu, kufika ku mutumba ako Lesa ko ebakambizhe mba akebalete. Amena. Aye waangachile ma nsakwa a balwanyi.

⁵¹ Shanji, Abulahama, wajinga na yewa mulaye, amba Lukunwa wanji wakine ukangata nsakwa ya balwanyi. Kabiji bizhilo bya meema byashiikile, kabiji aye kechi wakonsheshe kupitaila ne, kabiji aja jajinga jishinda ja mwingilo. Aye wafwaijilwe kuleta booba baana ku yewa mutumba. Lesa wa mubujile bya kuuba. Kabiji kwaimene kibelo kyasakwa mujishinda, kabiji waangachile nsakwa ya balwanyi.

⁵² Yoshiwa, palutwe kacheche, byo bafikile ku Kadeshi-beleniya, akyo kyajinga kipona kya buchibishi bwa mambo, apa ipo Isalela po akumenye luzhachisho. Twatana Yoshiwa na Kaleba, ne bakwabo twelufu . . . nangwa—nangwa bakwabo teeni. Umo kufuma ku mukoka umo batuminwe na kukikizha ntanda ayo mo bajinga benengezha kutambulwila.

⁵³ Kabiji byo bamwene aba bantu bazama kasa baimana byobya, jikumi ba mwi abo baumwine bingi bibi, baambile mba, “Atweba kuuba twikitambula ne. Kyabaisha bingi. Kika, talai pa bulwanyi bo tuji nabo.” Pakuuba byo babwelele pa kupana sawakya, bapaine sawakya watama.

⁵⁴ Kika kyakuletela sawakya watama, inge Lesa wibabujile mba, “Nemupa yoya ntanda; ke yenu”? Aye wibambijile mu Ijipita, “Nemupa ino ntanda, ke ntanda yawama, muji mukaka ne buki.”

⁵⁵ Bino byo bamwene bulwanyi bwabaya bingi, teni mwi abo babwelele ne kwamba mba, “Atweba kuuba twikyuba ne.”

⁵⁶ Kyajinga Yoshiwa, ye wazhindamikile bantu, kabiji waambile mba, “Atweba twakila kukonsha kwiitambala. Atweba twakila kukonsha!” Mambo ka? Aye watajilenga pa mulaye. Aye wajinga Lukunwa wakine wakwa Abulahama. Nangwatu bulwanyi bwikale byepi, “Twakonsha kwangata nsakwa, mambo Lesa witulaile ntanda.” Kabiji waangachile nsakwa.

⁵⁷ Kulutwe, byo aletele baana ba Isalela bafikile ku mukola. Kwaimene, mu ng'ondo wa Mulombola, mukola mukatampe, ubena kuvimba. Awa Yodano wapomokelenga kufuma mu mitumba, kabiji wakumbene mwaya misaza. Kyamwekele

nobe kimye kyatama, kya mu mwaka, pakuuba mba afike konka. Bino, nangwa byonkabyo, wajinga Lukunwa wakwa Abulahama. Aye wayukile mba uji na mulaye, kabiji wajinga mu ndoonda ya mwingilo. Lesa wamupele kimwesho, mwakwikyubila, kabiji waangachile mansakwa a mukola. Kimye mansakwa byo ashikukile, meema abwelele lunyuma mu mitumba. Kabiji Yoshiwa ne Isalela baangachile mansakwa a balwanyi, kabiji baabukile kuya mu ntanda ya mulaye, mambo Lesa wibabujile mba boobe. Lukunwa wa Kine wakwa Abulahama!

⁵⁸ Balongo ne banyenga, byo afikile kokwa kubushiya, Yeliko wajinga na kibumba yensetu, kyabaya bulongo pafwainwa kupita makalaki asatu peulu. Bakonsha kwikyuba byepi abo bena Isalela na byakulomba, mampoko akutola, ne bintu byonse, ne bichi kabiji ne mabwe, bafwaijilwe kutwelamo byepi momwa? Nangwa byonkabyo wajinga Lukunwa wa kwa Abulahama. Lesa wamupele kimwesho, wamubujile mwakubila bintu, waambile mba, “Mvumyai tolompita.” Amena. Abyo byokiji. “Bijikai, kifoola kuya ku kibumba, bizhilo bikapona ku meso enu.” Amena! Aye wajinga Lukunwa Wazhila wakwa Abulahama, aye wajinga waitabila wakine wa kwa Lesa. “Bizhilo bikapona panshi konka ku meso enu. Anweba mukabijiketu, ne kumvumya ntolopita. Abyo byo byonka byo mwafwainwa kuuba.” Kabiji kika kyamwekele? Bizhilo byaponene panshi, kabiji Yoshiwa waangachile muzhi.

⁵⁹ Kimye kicheche palutwe, twatana kuba mba balwanyi bapukwilenga bintu kasa baya, panyuma ya kyokyo, kabiji waimikile ne juba mu lwendo lwanjo. Nobe byonka byo Nasapwijile lukeelo lumo pa *Kitambabayezhi*, aye waimikile juba posotu byo atambwile nsakwa ya balwanyi banji. Amena. Aye wayukile mba umvwe awa mulwanyi wasambakana pamo jikwabo, bapalang’ejilemo, kabiji juba jayilenga nakuzhika, ne bena Amoli, ne bena Ameleki, kabiji ne bakwobotu, bapalang’ejilemo, inge babungakana pamo jibiji, kabiji bapwilakena pamo, wafwaijilwe kwikalala na kimye kyakosa bingi kya kwibalukuka jibiji. Kabiji kwajingatu kintu kimo akyo kyakwachijilenga, kyajinga ke kimye, kabiji aye waimikile kimye. Amena! Amena! Kwajingatu kintu kimo kya mukainyenga kutambula mulaye, jajinga ke juba, kilengwa na lesa akyo kine kyakilang’enye kulutwe, kabiji aye wakainye kilengwa na lesa. Kika? Aye wajinga Lukunwa wakwa Abulahama. Aye waketekejile mulaye wakwa Lesa. Aye wamukainye, kabiji waangachile mansakwa. Ee, mwane.

⁶⁰ Abo bantu bakatampe, bonse mulwabo ke bantu bakatampe. Bino mwayuka kimye abo, bonsetu ba mwi abo, byo baishile kufika pa kibelo kya lufu, bonse bafwile. Bonse ba mwiabo bafwile. Mambo bajinga bantu baya nkuwa, “Abo bashikile tu—tunwa twa ba bokwe, kabiji bapulukile ku mujilo, kabiji ne

kumpoko,” kabiji ne bikwabotu, byo twabulwa mu Bahebelu 11. Kabiji baangachile mansakwa a balwany, bonsetu bino mulwany umotu, ne yewa wajinga lufu. Lufu lwi baminine bonsetu.

⁶¹ Nanchi juba jimo, kwayishile Lukunwa Wazhila wakwa Abulahama, Yesu Kilishitu, aye Mwaana wakwa Lesa; Lukunwa wakwa Abulahama, konka kulwitabilo. Kechi kupichila mwi Izaka ne, lukunwa wa ku mubiji; abo baubile lubaji lwabo. Bino kwaishile Umo Ao wabujile kusemwa ku mubiji ne. Kwaiya Umo wabujile kwiya na lusako lwa masongola. Kwaiya Umo kupichila mu lusemo lwa kisungu. Aye Mwaana wakwa Lesa, awa Lukunwa wa kwa Abulahama, awe wajinga Muntu mukatampe wa musango ka! Bakwabo bonse bakumubiji basemekelwe mu lusemo lwa ku mubiji. Awe Muntu wasemekelwe mu lusemo lwa kisungu. Kika kyo Aubile byo Aishile pantanda? Aye washijile mulwany yense wajinga na Satana. Aye washijile bintu byonse.

⁶² Waubile byepi Aye? Aye waile kabiji Washijile misongo. Kechi kwajingapo misongo Yanji ne; konse kwatainwe misongo, Aye wiyishijile. Kika Aye kyo Aubile panyuma ya kwiwishinda? Aye witupele bakii, amena, kwamba mba, “Kyonse kyo mukakasa panopantanda, Namiwa ke kikasa Mwiulu.” Oo! Amena! Awa ye Lukunwa Wazhila wakwa Abulahama, mulaye Wanji. Aye Mupashi Wazhila uji mwi atweba pano, na bakii, kasa bakwachijila na kutazha ku misongo. Aye washijile misongo. Misongo kechi yakonsha kwimana mu Kyeenyi Kyanji ne. Kabiji Aye waabile mba Aye witupele bakii pakuuba mba tuube kintu kimo, kushinda misongo. “Kyonse kyo mukakasa panopantanda, Namiwa ke kikasa Mwiulu.”

⁶³ Ne alo, lweseko, Aye waesekelwe mu misango iji yonse byonka byokiji kwi atweba. Kika Aye kyo Aubile? Aye wilushijile. Kabiji Aye waabile mbaka kwi atweba? “Mukanai diabola, kabiji ne aye ukemunyema.” Aye witushijile misongo. Aye witushijile lweseko, wakundwile mansakwa; na angachile kii kufuma ku uleta meseko, ne kumupana ku waitabila, wa Mulukunwa wa kwa Abulahama, ne kwamba mba, “Inge aye wakweseka, mukanai aye, kabiji ukemunyema.” Oo, ami! Mukanai aye!

⁶⁴ Aye washijile byonse bibiji lufu ne kalunga kabafu. Aye wasangukile pajuba jabusatu, na kwaamba mba, “Amiwa nashinda. Kabiji mambo Njina bumi, ne anweba muji na bumi.” Oo, mulaye wa musango ka! Akyo ke ku Lukunwa wakwa Abulahama. Aye washijile kilende, wasangukile pajuba jabusatu, mu kwituletela lubingisho. Kimye kyo Asangukile, Aye wajinga lubingisho lwetu. Akyo kitulenga atweba kwikala ka? Aye washijile misongo. Aye washijile lufu. Aye washijile kalunga kabafu. Aye washijile kilende. Aye washijile lweseko. Oo!

⁶⁵ “Pano twakila mukushinda monka mwi Aye witutemenwe,

kabiji ne kupainamo bumi Bwanji,” byo ajinga Lukunwa Wazhila wakwa Abulahama. Na Mupashi umo wakwa Lesa mwi atweba, awa wajinga mwi Aye, atweba twakila mukushinda. Nsakwa yonse yashijilwa atweba. Kintutu kyo twafwainwa kuuba ke kwi yangata. Ya shindwa kala. Misongo yashinda. Lufu lwashinda. Kalunga kabafu kashindwa. Kilende kyashinda. Bintu byonse byashinda, kabiji twakwata bakii, monka mu lusa Lwanji. Obewa uji na moyo wa kwiabika mu loko, ne kwamba mba, “Naiya mu Jizhina ja Yesu Kilishitu?” “Ipuzhai Bataata kiji kyonse mu Jizhina Jami.” Namutemwa Aye.

⁶⁶ Pakupita myaka masauzande abiji, myaka masauzande abiji, kabiji Aye ukiji muno mukachi ketu, Kashinde Wabulume walepwile kipembe mu bipimvwa biji, akyo kyasendele misongo yonse, bikola byonse, ne kubika byonse pe Ayemwine, kabiji wasendele byalumanamo byetu pa musalabo, kabiji misongo yetu ne bikola byetu, kabiji wibishijile, ne kusanguka mambo alubingisho lwetu, kabiji waimana ke mumi pakupita myaka masauzande abiji, na kwimwesa Ayemwine nobe Yesu Kilishitu mumi, mukachi ka Lukunwa Wazhila wakwa Abulahama, abo baikala baswanyi ba bintu byonse. Oo, ami! Aba panyuma, yakupita mu lweseko, mu mulaye wa Kyambo! Inge mwakonsha kuketekela Kyambo, nanchi ne anweba mwi Lukunwa wakwa Abulahama. Abye byo mukeya kwi Aye.

⁶⁷ Inge wakakalwa kwesekwa kwa mu Kyambo, nanchi inge Wikizhinauka, waikala na milanguluko Yakyo yapusanako, wakakalwa kwi Kiketekela nangwa pachechetu ne, pajipo kintu kimo nangwa kikwabo, obewa wakakalwa Kwikiketekela ne, nanchi kechi wafwainwa kwiya mu mulaini wa milombelo ne. Amiwa kechi nafwainwa kukosamika kitapisho ne, poso waikala na lusa lwafikilamo lwa kuyuka mba Kyambo kya Lesa kyakine.

⁶⁸ Kabiji umvwe wapita momwa mu kipembe kya kubula lwitabilo, nanchi uji na bakii mu maboko obe, a lufu, kalunga kabafu, kabiji ne kilende, mambo obewa uji na Kashinde Awo wakushijiile. Nanchi obewa uji na Bahebelu 13:8, ao witubuula mba, “Yesu Kilishitu ujitu pamo keesha, leelo, ne myaka yonse.” Twakonsha kwikyuba byepi?

⁶⁹ Bantu leelo baamba mba, “Oo, kyawama, Nsakwimubula, Aye uji mu—mu jishinda ja musango umo, Aye byo aji.”

“Aye ujitu pamo,” Baibolo byo byo aamba.

“Oo, kyawama, Aye kechi uba leelo nobe byonka byo Aubile ne.”

⁷⁰ Twikitana ponka pano, inge twamona Kyambo Kyanji kyashinikishiwa. Kyuba byepi? Ki Kibwezha jibiji mu lubaji lwabo. Amena.

⁷¹ Awa Lukunwa wakine wakwa Abulahama wi Kiketekela. Abo Bekiyuka. Kabiji Aye wimana, bufuku buno, nobe byonka byo Akumenye Abulahama kokwa mu moba akwa Lota ne kuuba

kyokya kyakukumya, nobe byonka byo Aubile pa kubuula Sala byo aambile kunyuma Yanji. Yesu walaile, Lukunwa Wazhila wakwa Abulahama, amba Kipwilo kikamona bintu bimo Kwiya Kwanji kasa kukyanye kufika. Kyo kika? Kyafwainwa kumweka. Lesa wikilaile. Yesu Kilishitu wikishinikishe kabiji waambile mba byo kikekala, kabiji tuji pano leelo, pakupitapo myaka tuu sauzande, mu monai Aye mukachi ketu, ukijitu Kashinde Wabulume! Aye washijile lufu, kalunga kabafu, kilende, byakufwanyikizha; wasendele Kyambo...?...aye. Ee.

⁷² Aye waambile mba, “Inge mwaikala mwi Amiwa, kabiji Byambo Byami mwi anweba, ipuzhai kyonse kyomukeba kabiji kikapewa kwi anweba.” Kyajinga kika? Akyo Kyambo, Kilishitu, Akyo kiji mu muchima obe. “Inge mwaikala mwi Amiwa, ne Byambo Byami byaikala mwi anweba, anweba nishi mwashinda bintu byonse mambo Amiwa ne mushijiilebyo. Inge mwaikala mwi Amiwa, inge mwakonsha kung’umvwa Amiwa, inge mwakonsha kwikala mwi Amiwa. Aye wangitabila Amiwa, awo utambulwila Amiwa; kechi kitabila-mbijinga ne, pakuuba wakonsha kutambula. Aye umvwa Byambo Byami, umvwa Byambo Byami, ne kumwitabila Aye watuma Ami, uji na Bumi bwa myaka; kabiji kechi ukeya mu lweseko ne, nangwa mu luzhachisho ne, pakuuba wapitaila kufuma kulufu kuya ku Bumi.” Abyo Aye byo anji, Kashinde Wabulume!

⁷³ Pano Aye byoaji leelo, ujitu pamo keesha, leelo, ne myaka yonse. Uji pano Aye ubena kwingila ku Lukunwa wakwa Abulahama, ao waitwa kufuma mu Babilona, waitwa kufuma mu Sodoma, baitwa kufuma mu ntanda, kabiji baabanwa, na kumweshwa mulaye Wanji kwikala wakine. Pakupitapo myaka tuu sauzande, Aye wimana mukachi ketu, bufuku buno, awa Kashinde Wabulume, akyo Kyambo kya Lesa Kyakonsha kuyuka milanguluko iji mu muchima, kabiji ne kulondalonda mwayila milanguluko. Kyo kika? “Lukunwa Obe ukangata bizhilo bya balwanyani banji.” Kyo kika? Ke Lukunwa wakwa Abulahama, Lukunwa Wazhila, waketekela Kyambo. Kabiji Kyambo ye—Kyambo ye Lesa.

⁷⁴ Pano inge twamona kikye, twakonsha kubijika nabo pamo, nobe awa wasapawilo wakala:

Kwikala nabumi, Aye watemenwe; pakufwa,
Aye wapulwishe;
Kuzhikwa, Aye wasendele bubi bwami bonse;
Pakusanguka, Aye wambingishe kyatutu
kikupu:
Juba jimo Aye ukeya—oo, juba jawama!

⁷⁵ Muntu umo waambile mba, “Obewa ubena kukota, nsongwalume.” Amiwa kechi nakonsha kukwasha kyokyo ne.

⁷⁶ Naikala na bumi kufuma kimye kyo Najinga nsongwalume mucheche, kya kunokelamo kyami kyo Naikala nakyo ke kumona Kwiya kwa Kilishitu. Amiwa napaine bumi bwami na mambo akyokyo. Amiwa kijitu mu pulupiti, nobe mwanamulume mukote, Naketekela Jishimikilatu jimo, kabiji kintu kikatampe kyo Nakonsha kulanguluka ke kumona kwiya kwa Yesu Kilishitu kufuma mwiulu na kulonda Banji Mwine. Lesa, nanchi ami. . . Kechi kyakukumya ne twakonsha kwimba mba:

Bonse tumbijikai bulume bwa Jizhina ja Yesu!
Lekai Bamalaika bapone kikuvumene;
Letai michinya ya bumfumu,
Kabiji muvwikai Aye Nkambo wabonse.

⁷⁷ Kika? Aye ye Kashinde Wabulume. Inge uji mwi Aye, obewa uji mu Kyambo. Aye waambile mba, “Inge mwaikala mwi Amiwa, ipuzhai kyonse kyomukeba.” “Kika kyomukeba,” mambo nsakwa yonse yashindwa kala. Nanchi twakonsha kwamba mba:

Mambo yense mulaye uji mu Buuku ke wami,
Yense kyapitala, yense veeleshi, ne mulaini.
Amiwa mbena kuketekela mu Kyambo Kyanji
kya Bulesa,
Mambo yense mulaye uji mu Buuku ke wami.

⁷⁸ Balunda, mwavuluka kyokyo byo kyalumbulula nyi? Yense mulaye Lesa ye alaile kwi Abulahama, yense mulaye waambilwe na bangauzhi, yense mulaye Yesu Kilishitu ye alaile wa jino juba, Aye uji pano na kumushinikisha ne kumweshwa mba Aye mumi myaka ne myaka. “Lukunwa Wenu ukangata nsakwa ya balwanyi.”

⁷⁹ Inge kyafika ku kimye kya lufu. Mwaamba mba, “Pano ngaakyo?” Obewa ukijitu na Buswanyi byonka byaambile Paulo. “Obewa kilende, lushijilo lobe lujipi? Obewa lufu, lumuna obe uji kwepi? Bino sante ekale kwi Lesa, Witupana lushijilo kupichila mu yewa Kashinde Wabulume, Yesu Kilishitu.” Oo!

Lekai Bamalaika bapone kikuvumene;
Letai michinya ya bumfumu,
Kabiji muvwikai Aye Nkambo wabonse.

⁸⁰ Bufuku buno, pakupitapo myaka masauzande abiji, twaimana na kumumona Aye, nangwa byonkabyo, Kashinde Wabulume Ye watabwile akya kipembe kitwabanye ku mulaye wakwa Lesa, kabiji twakila mukushinda mwi Aye. Twayai tulombe.

⁸¹ Taata Wamwiulu, byo twaimana pano, bufuku buno, mu Kyeenyi kya Mupashi Wazhila, awa Muntu mukatampe wa bu Yesu Kilishitu mu musango wa bu Mupashi, Ao walailwe kwiya ku Lukunwa wakwa Abulahama, aye Lukunwa Wazhila, twalomba, Anweba Lesa, inge kuji mwanamulume nangwa

mwanamukazhi, nsongwalume nangwa nsongwakazhi, muno, awo wabula kwimuyuka Anweba, baji na luzhinauko ne kulubakana kwa mu michima yabo, na mambo a Kyambo kya Lesa, kana Kiji Bukine nangwa ine, Anweba Lesa Mukatampe, Anweba mwalaile, iyai bufuku bunu! Kuji mulaye umo mukatampe Ye mwalaile, Nkambo, Anweba mwakonsha kulama yewa mulaye, Anweba mwaambile mba, “Aye wangitabila Amiwa, mingilo Yonguba ne aye ukeyuba; ne byakila pa bibye mukeyuba, mambo Amiwa ngya ku Bataata.” Lesa Taata, twalomba mba Anweba musakushinikisha Kyambo Kyenu.

⁸² Muji bavula baana bakwa Abulahama bufuku bunu, abo bakolwa. Oo, diabola wi bamanyika; be abika mukachi, kabiji bazhokolosha bakii, kabiji waambile mba, “Pano wafwainwa kufwa; uji na lukatazho lwa muchima. Uji na *kikye, kyokya*, nangwa *kikwabo*, kabiji wafwainwa kufwa.”

⁸³ Anweba Lesa, lekai ntolopita ya yubili imvume, bufuku bunu, ya Mamboawama, amba muzha yense wakonsha kwikala ke mwanawabene! Yesu Kilishitu washinda byobya bizhilo. Twakwachijila bakii mu maboko etu. Oo! “Mu Jizhina Jami bakapangilamo bademona. Inge mwaipuzha ba Taata kiji kyonse mu Jizhina Jami, Amiwa ke kyuba. Aye wangitabila Amiwa, mingilo Yonguba ne aye ukeyuba. Akyo Kyambo kya Lesa kyangitwisha kabiji kyabulume kukila mpoko yatwakubiji, kuchibaula na kwabanya mikolokofwa, kabiji ye upima milanguluko iji mu muchima.”

⁸⁴ “Kabiji byonka byo kyajinga mu moba akwa Nowa, nanchi byobyoyo kikekala ne pakwiya kwa Mwaana muntu, mambo bajilenga, batomenenga, ne kusongola, ne kwikana; mitanchi ikatampe ya kushimika.” Kabiji tubena kumona ntanda, “Kukekala biyukilo, bileta moyo mwiulu (akye ke bipita mwiulu), bitentashi mu mampuzha apusanapusana, kalunga na kusukena (manyaki ameema), michima ya bantu ke ipungile (na moyo), malwang’ano pakachi ka byaalo, bakumya na mambo a kimye.”

⁸⁵ “Kabiji byonka byo kyajinga mu moba akwa Lota, nanchi byobyoyo kikekala ne pakwiya kwa Mwaana muntu.” Anweba Lesa, iyai bufuku bunu kabiji ne kuuba Kyambo Kyenu, iyai bufuku bunu na kupana lwitabilo lwa baana bakwa Abulahama. Kupichila mwi Yesu Kilishitu mu Jizhina twikipuzha. Amena.

⁸⁶ Aye Nkambo emupeshe, pa katampe. Amiwa kechi mbena kwita bantu kukitapisho pa kino kimye ne. Amiwa nsakwikisha kwi anweba. Nalanguluka kyokyo, bimye byavula, kwita bantu ku kitapisho. . . Naketekela nabo pamo. “Pakuuba mo bavujila ba mutambula, ba batizhiwe.” Byo kiji, “Bavula bamutambwile Aye.” Tusa kulombelela bakolwa.

⁸⁷ Nakonsha kwamba muno bufuku bonse. Anweba mwi jibumba jawama. Pano kyo Ng’amba ke bu muntutu; bino

inge Naamba Byambo Byanji, nanchi kechi ke byambo byami ne, ke Byambo Byanji. Inge Naamba kintu kimo, kabiji Lesa wabula kwikiswisha ne, nanchi akya kyajinga kyambo kyami. Inge Naamba Kyambo Kyanji, kabiji Aye Wikitabizha, ing'anyi awa mwanamulume ndengamambo nangwa mwanamukazhi, nsongwalume nangwa nsongwakazhi, ao ukafumako kabiji ne kwamba mba kechi byo Kiji ne?

⁸⁸ Yesu, waambile mba byo Aubile bibye bintu, baambile mba, "Awe Muntu ke ubulang'ana biji lutwe lwa bumi bwa muntu. Aye ke diabola!" Ubulang'ana biji lutwe lwa bumi bwa muntu, uji yense wayuka mba ubulang'ana biji-lutwe lwa muntu ke diabola. Aye waambile mba, "Aye ke muntu ubulang'ana biji lutwe lwa bumi bwa muntu." Bino mwakimonapo muntu ubulang'ana biji lutwe lwa bumi bwa muntu usapwila Mamboawama nyi? Bushe mwakimonapo muntu ubulang'ana biji lutwe lwa bumi bwa muntu upanga bademona? Ine, kinekine, abo kechi be kyuba ne.

⁸⁹ Aye waambile mba, "Pano, Amiwa Mwaana muntu nkemulekela mambo pa kikye. Pakuuba umvwe Mupashi Wazhila waiya, kwamba kyatama kwi Aye kechi ukalekelwa mambo ne mu inontanda nangwatu muntanda ikeya, mambo ke kutela mwingilo wakwa Lesa mba mupashi watama."

⁹⁰ Lesa etubile lusa, bufuku buno, kabiji Nalomba mba Lesa usa kwiya na kwikajika kikye Kyambo kwi anweba.

⁹¹ Mulongo, nyenga, awe ye mweo wami. Nafwainwa kukumanya Lesa. Amiwa njina mwingilo wa byo Ng'amba kwi anweba. Lesa ukazhachisha pa nsambu ya kwamba pa kikye. Abyo ibyo. Ing'anyi buwame bo kyakonsha kuuba kwi amiwa kwimana kuno ne kwamba bibye bintu inge Nayukile mba Mbeni kuzhachisha mweo wami kuya ku gehena?

⁹² "Kuji jishinda jimweka bulongo ku muntu, pakuuba mpelo yajo ke mashinda alufu." Lesa kechi ukeba ulumbulula ne. Monka mo Naambila, Aye ulumbulula Kyambo Kyanji Ayemwine.

⁹³ "Awa Lukunwa wakwa Abulahama ukangata nsakwa ya balwanyani." Mwikiketekela nyi?

⁹⁴ Inge Nakonsha kwimubuka, Nakonsha kwikyuba. Kilishitu wimubuka kala. Kintutu kimo, anweba muji na kii mu kuboko kwenu. Awa kii ke lwitabilo loobe, ne kumukwachijila. Wamunshikula, bufuku buno, wakonsha nyi? Kimye Aye kyo abena kwiya mukachi ketu, awa Kashinde Wabulume washijile kikola kiji kyonse, kabiji waiya kuno na kumweshwa mba Aye wikyuba, mambo Aye ukijitu Kyambo. "Kabiji Kyambo kyo kipima milanguluko iji mu muchima."

⁹⁵ Ng'anyi kitupa kya milombelo? B, wanu kufika... Twatatwijile pepi, bufuku bukwabo? [Muntu umo waamba mba, "Wanu."—Waku.] Twayai tutatwile pa fifite. Ng'anyi uji

na kitupa kya milombelo B, fifite? Sutulai kuboko kwenu. Kitupa kyamilombelo B. Twatatwijile kufuma ku wanu, bufuku bukwapo, pano tusakutatwila pa fifite, bufuku buno.

⁹⁶ Ng'anyi uji na B, B, fifite? Sutulai kuboko kwenu. Kitupa kyamilombelo B, fifite. Kyalumbulula mba kechi kiji muno nenyi? Bushe muji nakyo nyi? Kijitu bulongo, B, fifite. B, fifite-wanu, ng'anyi uji nakyo? B, fifite-wanu, kijitu bulongo. B, fifite-tuu, ng'anyi uji na B, fifite-tuu? Kijitu bulongo, muji nakyo. B, fifite-fili, fifite-foolo, iyai kuno. Fifite-foolo, fifite-faivi.

⁹⁷ Nsongwalume wami wiya kuno, Amiwa kasa kyangye kwiya kuno ne, ne kusalang'anya byobya bitupa. Kabiji monai byo biji, kimo *papo* ne kikwabo *kokwa*? Abo kechi bayuka ne. Mwafwainwa kwiiya mu *uno* mulaini ne kutola wanu, walondelapo watambula teni, mukwabo watambula tweti-faivi. Atweba kechi twayuka kokiji ne, bino, konse ko batanwa.

⁹⁸ Pano baanga botwakonsha kwita? Faivi, foolo? B, fifite. Wajinga B, fifite, kechi ibyo nenyi? [Muntu umo waamba mba, "Ee."—Waku.] B, fifite kufika ku fifite-faivi. Fifite-sikisi, fifite-sebeni, fifite-eiti, fifite-naini, sikisite. Pano twayai tumone, wanu, tuu... Belengai, Billy, kabiji tusa... Sikisite, sebeta, balekai bemane patanshi, inge bakonsha. B, fifite kufika ku sebeta, sebeta-faivi. Bibelengai, Mulongo Roy, inge wakonsha, kimye kyo Mbena kwamba ku jibumba.

⁹⁹ Baanga baji momo byo mubena kutala kukwe, kabiji kechi muji na kitupa kya milombelo ne?

¹⁰⁰ Vulukai, Yesu waambile mba, "Mingilo yo Nguba ne anweba mukeyuba." Akyo kyakine nyi? Akyo kyakine. Mwikiketekela nyi? Awa Lukunwa wakwa Abulahama ye wikyambile.

¹⁰¹ Aye Baibolo waamba, mba, "Aye ye Ng'anga Mukatampe." Bahebelu, kyapitala kyabu 4, "Aye ye Ng'anga Mukatampe wakonsha kukwatwa ku byalumanamo byetu." Mwikiketekela nyi? Inge Aye ye umotu keesha, leelo, ne myaka yonse, Aye wakonsha kwikyuba byepi?

¹⁰² Kwajinga mwanamukazhi wachepa mubiji, mu Baibolo, nobe byonka byo mubena nkumona kasa Mbena kwaamba. Mwanamukazhi wachepa mubiji, mu Baibolo, kape kechi wajinga nakitupa kya milombelo ne; bino waambile mu muchima wanji mba, "Inge Nakonsha kukwata yewa Muntu, Namuketekela Aye." Aye waonawine byonse byo ajinga nabyo, kuba doko- . . . kuba madokotala. Abo kechi ba mukwashishe ne. Lukatazho lwanji lwajinga lwabaisha. Abo kechi bakonsheshe kumukwasha ne. Bino aye waketekejile mba Lesa wakonsha kumukwasha. Kabiji wakwachile kwapela Kyanji, kya kuvwala Kyanji.

¹⁰³ Kabiji Aye waambile mba, "Nayuka mba bulume bwafumamo mwi Amiwa." Abyo ibyo nyi?

104 Mwaketekela mba Aye ujitu pamo, bufuku buno? Mwaketekela mba Aye uji muno nyi? Baanga baketekela mba Aye wasanguka kufuma mubafu? Pano mwakonsha kushinikisha byepi Aye mba wasanguka kufuma mubafu?

105 Kechi papita kimye kyabaya ne, muntu wayukanyikwa bingi waki Baptist waishile kwi amiwa, kabiji aye waambile mba, “Mulongo Branham, Nanshijilwe—kushindwa, kimye kimo, ku Mwinamammedi waambile kyokyo. Aye waambile mba, ‘Inge Aye wasanguka, Aye walaile mba Ukoba kintu kimo. Twayai tumumone Aye ekyube.’” Monai, baketekela mba Aye kechi wikyubile ne.

106 Bino twaketekela mba Aye wikyuba. Twaketekela mba Aye wasanguka kufuma mubafu. Kechi kujipo bupopweshi bukwabo panopantanda bwakonsha kushinikisha mba wibutatwile uji na bumi, kanatu Bwinakilishitu. Kabiji jishindatu jimo Lesa jo akonsha kwi Kishinikishamo, ke kupichila mu booba be Kiketekela, mambo ajo jo jonka jishinda Lesa jo engijilamo Byambo Byanji, ke booba be Kiketekela.

107 Pano kimye kyo babena kutatama kukwe mu mulaini mucheche wa milombelo kukwe, Amiwa kechi nayuka kana baanga basakutambula ne, Nakeba anweba bonse pa muntu pa muntu, mwikale mu kifulo kyenu, mwikale mu kipona kyenu, kechi mwendaukenga ne, talai kukwe ne kulomba, ne kwamba mba, “Nkambo Yesu, Naketekela.”

108 Anweba vulukai, Aye wambujile mba, “Inge mwakonsha kulengela bantu kukwitabila obewa; kabiji waikala wabukishika pa kulomba.” Akyo kyaubiwa mwaya kino kyaalo, kuyamo ne kubwelamo, pa myaka fifitiini, kechi pajipo nangwa kimye kimo po kyakakelwe ne. Kechi kyakonsha kukakalwa ne.

109 Lesa, kintu kimo Lesa kyo akonsha kubula kuuba ne, ke kukakalwa. Aye wafwainwa kulama Kyambo Kyanji. Naketekela kyokyo. Naketekela kyokyo pamo nobe byonka byo Nji. . . kukila ne byo Naketekela mba Naimana pano, kukila ne byo Naketekela mba Naimana muno mu kishimikwa; akye kyakonsha kwikala kimonwa, kyafwainwa kwikala kiloto. Mu mweo wami, Nayuka mba Yesu Kilishitu Mwaana Lesa mumi. Kabiji obewa byo uji Lukunwa wakwa Abulahama, obewa wafwile mwi Kilishitu, wi Lukunwa wakwa Abulahama.

110 Pano baji na tutambala kuno. Mwingilo wawama wingijiwa mu bibye, ku bantu baketekela. Pano twayai tukunyiike mitwe yetu, kimye kyo babena kwinengezha, ne kulombelela baabo.

111 Taata Wamwiulu, twafunjishiwa mu Baibolo, kabiji kuji bantu muno baketekela Kyambo kyonse kyo Mwaambile mba kya Bukine. Nkambo, bimye bimo bapaapala ne kusaba pajine jilozo, na kii, na kwikipusa, ne kwikitaya, bino bakatekela mba kiji konka. Lekaitu batwajijile na kwimbapo, abo baketena, mambo kiji konka. Kabiji awa kii ye kii uji bulongo, “Inge

mwakonsha kuketekela, bintu byonse byakonsheka kubiwa.” Nobe byo babena kwimba lwimbo pa kino kimye, nagwa kwimba lwimbo.

112 Mu Baibolo kyaambiwa mba, “Paulo wafumishe ku mubiji waji tutambala ne maepulo, kabiji ne kwibituma ku bakolwa ne bamanyikwa, ne mipashi yatama yafumine mu bantu, kabiji babukilwe.”

113 Pano, Nkambo, twayuka Paulo Wazhila uji ne Anweba. Bino, kechi kyajinga aye ne; kyajinga Anweba, Nkambo, Kilishitu mwi aye. “Kechi ke amiwa wikala na bumi ne, kana Kilishitu wikala mwi amiwa,” byo aambile.

114 Kabiji pano ku kino kisemi, Anweba mukijitu Kilishitu, leelo, byonka byo mwajinga keesha. Kabiji byo Mbena kulombelela pa tutwe tutambala, ne kwitukwata, Nalomba mba Anweba musakushinda mulwanyi yense. Panai lwitabilo, ne kwibaleka bayuke mba mulwanyi washindwa.

115 Kabiji kimye kimo, Kalunga Kachila, nobe byonka byo twaambilepo, walengejile Isalela wachibiwako kufuma ku mulaye, kabiji bajinga mu ndoonda ya mwingilo. Kabiji munembeshi umo waambile, mba, “Lesu watajile panshi na meso azhingila, kupichila mu yewa Mumbulungwa wa Mujilo, ne kalunga ka umvwine moyo kabiji kashikwile bizhilo byako, ne kwabuka baabukile.”

116 Talai panshi, bufuku buno, kupichila mu Mashi akwa Yesu Kilishitu. Kabiji lekai, atwe tutambala byo tukabikwa pa bakolwa, lekai mulwanyi amone lwitabilo lwetu, bufuku buno, byo tubena kwibalombelela mulombelo wa lwitabilo. Kabiji lekai umo umu apokololwe, mu Jizhina ja Yesu Kilishitu. Amena.

117 Pano Nakeba maana enu onse. Yense uji pa maikolo foni koko, mubikai bulongo. Mambo, inge Mupashi Wazhila wakonsha kuuba kikye...Amiwa kechi naamba mba Aye usakuba ne.

118 Pano uji yense wafwainwa kwiya kuno ne kwimubula mba baji na bulume bwa kubuka bakolwa, anweba kwikiswa ne. Bulume bonse buji mwi Kilishitu. Aye ye Kashinde, kechi obewa ne Amiwa ne. Atweba tuswatu byonka Aye byo auba. Kafwako muntu uji na bulume bwa kupulusha nangwa kubuka ne.

119 Muntu yense mu ntanda, mutengo walipilwa kala. Nkebelo ya lipilwa kala. Kyajinga pyepi? “Aye wamanyikilwe namambo amizhilulwila yetu, ku bipumo Byanji ko twabukijilwe.” Lwenu—lwenu lubuko lwalipijilwe. Lupulukilo lwenu lwalipijilwe. Anweba muji na lwitabilo lwa kwiya, ne kwikiswa? Kyo kyonka. Inge wi Lukunwa wakwa Abulahama, uji nalo. Lesu wikilaile. Pajipo kintu kimo mwi obewa akyo kyaamba mba kiji konka, kabiji byo kiji.

¹²⁰ Pano kyabupe kyo kika? Bushe ke kya bupe kya kuya na kubuka bantu? Ine. Kyabupe ke kwifumya obewa mwine mujishinda, pakuuba mba Lesa wakonsha kukwingijisha.

¹²¹ Pano Aye walaile mba, kiyukilo kyapelako, mwayila Yesu Kilishitu, “Byonka byo kyajinga mu moba a Sodoma, kasa ukyangye kusokwa ne.” Kechi bintu bikwabo kasa bikiyangye kubiwa ne, Mamboawama asapwijilwe ne Lota, ne bikwabotu; kechi bya byobyoby ne. Bino kasa ukyangye kusokwa ne, Lesa waishile mu musango wa muntu, ne kwikala na Kipwilo kya basalululwa, Abulahama ne jibumba janji, bajinga na mulaye.

¹²² Pano mvulukai, yenkatu Lukunwa wakwa Abulahama ye utambulwila kikye. “Pa kakimye kacheche bapano pantanda kechi bakamona Amiwa ne,” Yesu byo aambile. “Anweba mukamona Amiwa, mambo Amiwa kekala nenu, ne mwi anweba, kufika ne kumpelo ya ntanda.”

¹²³ Bino Aye walaile, mba saka Akyangye kubwela jibiji ne, “Byonka byo kyajinga mu Sodoma,” monai Sodoma byo abena kumweka; monai Kipwilo kyasalululwa byo kibena kumweka, waambile mba, “nanchi byobyoby kikekala ne pakwiya kwa Mwaana muntu.” Lesa wamwekele mu musango wa muntu, ao na nyuma Yanji yavundamina ku tente, wamubuujile bya ubile Sala mukachi ka tente. Muntu yense wayuka mba abo bo Bukine, sutulaiko maboko enu. Abyo kine ibyo. Pano Aye wikilaile. Tuji mukimye kya kumpelo. Pano vulukai, akya kyajinga kintu kyapelako akyo kyamwekele; kabiji ne ntanda ya ba Ngetila yasokelwe, Sodoma, ne mwaana walailwe waishile pakyokya kimye. Tubena kupembelela Mwaana walailwe, Mwaana wakwa Lesa.

¹²⁴ Pano potuji. Lekai Lesa ashinkule meso enu. Amiwa kechi nayukapo kintu kkwabo kya kwamba ne. Lekai Aye ashinkule meso enu.

¹²⁵ Pano Taata Wamwiulu, Amiwa kechi nji na mwakwikwashisha ne, Amiwa ne buchimba abo Anweba bo mwalengele, kabiji ne kwibubika kuno. Anweba Lesa, lekai Ami, bufuku bunu, ngikale na lusa Lwenu ne Kyeenyi, amba kikale Anweba wakwingijisha bubwe buchimba bucheche Bomuji nabo muno. Kyakuuba mba, Nkambo, aba Anweba bo mwaita ku Bumi Bwapeenape, kabiji kepepo kechi ba Kikiswa ne, lekai bamone iye milaye. Bafwaijilwe kufunjishiwa kuuba mba abye ke bya juba jikwabo, bino papo pobiji mu Baibolo. Kishinikishai Kye, Nkambo. Ako ko kulumbulula Kwenu Amweba bene. Kechi kikebewa ne kukila pa kyokyo ne. Inge Anweba mukeyyuba byobyoby, nanchi abo bakamona mba Kyambo kyakine. Kiswishai kye, Taata. Twipana atweba bene kwi Anweba.

¹²⁶ Lekai muntu yense uji muno, Nkambo, engijishe lwitabilo lwabo, bufuku bunu. Lekai membala yense wa Mukoka wakwa

Abulahama, kupichila mwi Yesu Kilishitu, ekale na lwitabilo, bufuku buno, kabiji baswe Kyeenyi Kyenu. Kabiji tusakupana lutakaiko kwi Anweba. Amena.

¹²⁷ Pano, bushe akye ky-. . .Pano akye ke kyeenyi. Nasaka namba anweba munkwasheko, ndombeshaipo. Ikali mwazhindama, kechi mwendauche ne. Ikali bazhindama, na kulomba.

¹²⁸ Pano, monai, kibena kupipulwa kufuma ku busapwishi, kuya ku kukokoloka mu musango wakuuba mba Mupashi wa kwa Lesa wa kusenda kypawijijika kuya mu kibese kikwabo.

¹²⁹ Pano papo paimana yuwe mwanyike. . .Iya kuno pacheche, inetu. Kabiji kijitu. . .Akyo kijitu bulongo, nanchi kechi Nsakufumako ku yuwe maiki ne. Monai, Amiwa kechi nayuka kimweka ne, mwamona, kabiji kimye kimo, mwayukatu. . . Pano jishindatu jimo jo Nayuka, ke—ke japa maiki, mwamona, kabiji babena kweseka kwikikwata kokwa, kabiji kechi Nayuka kine kintu ne.

¹³⁰ Pano twi benyi umo ku mukwabo. Amiwa kechi nakuyuka ne, kechi na kumonapo mu bumi bwami ne. Bino wi mwanyike bingi kukila Amiwa. Kabiji twasemekelwe mampuzha apusanako, kabiji ne myaka yapusanako. Akye kyo kimye kyetu kitanshi kusambakana. Abyo ibyo nyi? Inge byo kiji, sutula kuboko kobe pakuuba mba jibumba jimone. Pano, aye ke mwanamukazhitu waimana papo.

¹³¹ Talai, kibwezha ku Kinembelo. Twayai tutole Yoano Wazhila 4. Anweba bonse mwikitanga inge mwaya kunzubo. Kechi—kechi kyakuuba mba awe mwanamukazhi ke yewa musango wa mwanamukazhi ne; Amiwa kechi nayuka ne. Kabiji mwayuka mba Amiwa kechi ne Yesu Kilishitu ne. Bino Aye uji muno. Ke Aye. Pano Mupashi Wanji ubena kwitushinga manyi, wakonsha kusolola lukatazho, nobe byo Aubile ku mwanamukazhi ku mushima. Kintutu kimo.

¹³² Kabiji, monka mu kyokya, amo ba mapulisiti ne batangi ba joja juba, baambile mba, “Awe Muntu ke ubulang’ana biji lutwe lwa bumi bwa bantu, nangwa diabola, Zelebabuba.”

¹³³ Awe mwanamukazhi waambile mba, “Mwane, Nayuka mba Anweba mwi Ngauzhi. Twayuka mba Mesiyasa ubena kwiya, kabiji akye kikekala ke kiyukilo Kyanji.”

¹³⁴ Pano, baanga bayuka mba akyo kyakine? Kyawama, inge Aye ujitu pamo keesha, leelo, ne myaka yonse, bushe akyo kuuba kyaikala kiyukilo Kyanji bufuku buno nenyi? Bushe Aye walaile mba byo kikekala, mpelo ya kimye kasa ikyangye kufika? Pano monai inge Aye walama mulaye Wanji kwi Lukunwa wa kwa Abulahama.

135 Pano inge yense uji muno walanguluka mba kyaya mungi, iya kuno ube kintutu kimo. Inge kechi byo kiji ne, nishi kwambapo kintu nangwa kimo pa kikye ne. Obewa uji na jishuko.

136 Pano, mu Jizhina ja Kilishitu, Nabika mupashi yense uji muno mu lusa lwami, ku lukumo ne munema kwi Lesa.

137 Amiwa nsakwambatu kwi obewa, pa kimye kicheche, inetu wakyanyike. Wayukatu, Nkambo yetu waambile ku yewa mwanamukazhi ku mushima. Aye waambile mba, “Ndetelepo Amiwa bya kutoma.” Kika Aye kyo aubilenga?

138 Pano monai, Aye waambile mba, mu Yoano Wazhila 5, “Kine, kine, Nemwambila namba, Mwaana,” awa wajinga Aye, mubiji, “kapaji kyo akonsha kuuba mwi Ayemwine ne,” kanatu byonka byo Amona Bashanji na kuuba. “Byonka byuba Bataata, Aye umweshwa Mwaana. Mwamona, Amiwa kapaji kyo nakonsha kuuba mwi Amiwamwine ne, kanatu byonka byo Mona Bataata na kuuba.” Nanchi, Yesu kechi waubilepo kya kukumya nangwa kimo ne kana patanshi Lesa Wamumweshwa kupichila mu kimwesho; kechi ku mubuula Aye mu kutwi Kwanji ne, pakuuba Wamumwesheshe. “Kyo Mona,” kechi kumvwa ne, “kumona Bataata kasa booba.” Akyo kyo Kyamulengele kwikala Ngauzhi wa mu musango wakwa Mosesa, byonka byaambile Mosesa. Pano Aye—Aye wibayukile Bashanji. . . Aye wajinga. . .

139 Aye wailenga ku Yeliko, bino Aye wafwajilwe kupita ku Samaliya, kabiji Aye waishile ku muzhi watelwa mba Saika. Kabiji pano monai, bena Samaliya bakebelenga Mesiyasa.

140 Ba Yudeya bakikebelenga akye, kabiji Wibamwesheshe kiyukilo Kyanji. Filipai, Natanela, Petelo, ponkapotu akya kiyukilo byo kyaubiwe, baambile mba, “Obewa wi Mwaana wakwa Lesa.”

Aye labi waambile mba, “Awe Muntu ye Zelebabuba.”

141 Bino pano vulukai, ba Ngetila, atweba, twajinga ba Anglo-Sakisoni, atweba—atweba kechi twapembejilenga Mesiyasa ne. Atweba twajinga batunshi, bena Loma, ne bakwabotu. Atweba kechi twapembejilenga Mesiyasa ne. Aye wiyatu ku booba babena Kumupembelela.

142 Bino bena Samaliya ba mupembejilenga Aye, nanchi Aye wapichile konkwa kwa, akwa ku Samaliya. Aye waikela konkwa ku mushima. Inetu mwananyike, kapepo uji pamo na myaka yobe, waishile. Aye wajinga mwanamukazhi wa wayukanyikwa-na byubilo byatama. Anweba mwatanga jishimikila, Naketekela. Kabiji Aye waambile mba, “Mwanamukazhi, Ndetelepo bya kutoma.”

143 Waambile mba, “Oo, kechi kisho kwi Obewa, Muyudeya, kwimpuzha byobyoyo ku Mwinasamaliya ne.”

144 Aye waambile mba, “Bino inge wayuka Ye ubena kwamba nanji, inge wangipuzha Amiwa bya kutoma.”

145 Misambo yatwajijiletu. Pakupezhako, Aye wataine lukatazho lwanji po luji. Mwavuluka byo kyajinga nyi? Aye wajinga na banabalume bavula. Kabiji waambile mba, “Yanga ukalete mulume obe, eye kuno.”

Aye waambile mba, “Amiwa kechi njipo na umo ne.”

146 Waambile mba, “Obewa waamba bulongo,” waambile mba, “mambo uji na faivi, kabiji awa ye uji nanji kechi obe ne.”

147 Aye waambile mba, “Mwane, Nayuka mba Anweba mwi ngauzhi. Twayuka mba Mesiyasa ukeya, Aye uketubuula bibye bintu.”

Kabiji Aye waambile mba, “Amiwa yami Iye.”

148 Mwanamukazhi wanshile mulondo wANJI wa meema, ne kunyemena mumuzhi, kabiji waambile mba, “Iyai, mumone Muntu Ao waambula byo Naubile. Bushe awe kechi ye Mesiyasa nenyi?” Abo kechi bajingapo na ngauzhi pa myaka maaduleedi ne. Kabiji pano paji Muntu umo witongwelenga mba ye Mesiyasa, kabiji washinikishiwe kwikala nga—ngauzhi, kabiji wamwesheshe kiyukilo kya Bumesiya.

149 Kyakonsha kulengela obewa kuketekela kintu kimo, inge Aye wauba kintutu kimo, byo aji Aye ujitu pamo keesha, leelo, ne myaka yonse, kabiji yalailwa mu Binembelo amba Aye ukeyyuba?

Bushe kyakonsha kulengela jibumba kuketekela nyi?

150 Obewa wamanyikwa ku lukatazho lwa jifyo. Inge abyo ibyo, sutulai kuboko kwenu.

151 Kika kyo kyaikela byobyoyo kimye kyonse kumvanyika mu kilungi kyami? Muntu umo waamba mba, “Aye wafwanyikizhatu kyokya.” Amiwa kechi nafwanyikizhatu kyokyo ne.

152 Apo, aye ke mwanamukazhi wawama. Bushe waketekela amiwa nyi? Pano mwayuka mba Amiwa kechi nafwanyikizha kyokyo ne. Lekai ng’ambepo kintu kikwabo. Mulume obe uji pamo ne obewa. Aye ubena kumanama, ne aye. Kechi ibyo nenyi? Ke musango wa mulongololo. Abyo ibyo. Kechi ibyo nenyi? Obewa uji na nsongwalume mucheche. Aye ubena kumanama, ne aye. Obewa ubena kukeba kumulombelela. Aye uji na kintu kimo kyatama na meso anji. Abyo ibyo. Obewa uji na nsongwakazhi mucheche, uji na lukatazho lwa jifyo, nobe obewa. Abyo ibyo nyi? Pano mwakonsha kwikalatu bakonsa bulongo anweba bonse, inge mwakonsha kuketekela. Mwikiketekela nyi? Lesa emupeshe. Yainga kwenu mwikale bulongo.

153 Mwaketekela nyi? Aye ujitu pamo keesha, leelo, ne myaka yonse. Kyo kika? Kika kyo abena kweseka kuuba? Kwi obewa, Lukunwa wakwa Abulahama, Aye ubena kukumweshesha mba Aye kechi wafwa ne. Amiwa kechi nakonsha kuuba byobyoyo bintu ne. Aye kechi wafwa ne. Bino Aye uji na bumi, ubena kumweshesha mba

uji na nsambu ya kutambula nsakwa ya balwanyi bobbe. Akyo kyafwainwa kwikipwisha.

¹⁵⁴ Awe inetu, waiya mujije jishinda, pa kakimye kachechetu. Twazhokoloka, pepi nobe myaka imo, Naketekela. Bino atweba—atweba twi benyi umo ku mukwabo, nobe mo Nayukila. Amiwa kechi nakuyuka ne, kabiji twibenyi umo ku mukwabo. Amiwa kechi nayukapo kintu nangwa kimo pe obewa ne. Inge abyo ibyo, sutulai kuboko kwenu, mwamona. [Aye nyenga waamba mba, “Abyo ibyo.”—Waku.] Bino bantu bamo bapana kitupa kya milombelo kwi obewa, kabiji uji pano. Kijitu bulongo. Pano inge aye Nkambo Yesu . . .

¹⁵⁵ Inge Amiwa, kapepo, naamba mba Amiwa mbena kweseka kusenda kalifulo kya kwa Mulongo Oral Roberts, nangwa bamo bantu balwitabilo lukatampe, Nakonsha kwamba mba, “Inetu, kika kyatama kwi obewa?”

¹⁵⁶ Mwakonsha kwamba mba, “Kyawama, Amiwa njina *kikananga-ne-kikananga*.” Bino, kechi wakonsha kwikala kyakine ne. Mwamona? Amiwa kechi nayuka ne. Mwamona? Bino, aye, wakonsha ku mubuula kintu kyatama.

¹⁵⁷ Aye wakonsha kubika maboko pe obewa, ne kwamba mba, “Lesu wantuma ku—kulombelela bakolwa. Mwaketekela kyokyo nyi?” “Ee.” “Lukumbo lwikale kwi Lesu! Yanga, kiketetele.”

¹⁵⁸ Kijitu bulongo. Kijitu bulongo. Lesu walaile kyokyo. Bino, mwamona, tubena kwikala palutwe pacheche pa—pa juba jakila pa kyokyo. Yesu walaile mba, “Byonka byo kyajinga mu moba a Sodoma. Mingilo yo Nguba ne anweba mukeyuba.”

¹⁵⁹ Pano, inge Lesu wakonsha kumbula byo waji, mwayuka kana akyo kyakine nangwa ine, Aye ukakubuula musango ye ukekelamo, kabiji umvwe kyakine, akye kikekala kyakine, ne akyo.

¹⁶⁰ Inge Aye wakubuula, kiji kyonse, Amiwa kechi nayuka ne, bino inge Aye wakonsha kumbula lukatazho lobe byo luji, mwakonsha kwikiketetelele, ne akyo, jibumba?

¹⁶¹ Amiwa kine nafwainwa kuleka. Akyo kimye kimo, awa muntu wajinga kuno mu kimye kypita kunyuma, awa wafwainwa kwikishinikisha. Yesu wikyubilepo kimye kimo. Aye kechi wikyubilepo ne jikwabo ne. Muntu yense mu Saika wikiketejile, waketekejile lushimuno lwa yewa mwanamukazhi, byo ayishile, wibabuujele, kabiji wajinga mwanamukazhi wayukanyikwa-nabyubilo byatama. Aye Mwinakilishitu wafumapotu pa pulatifomu katataka, kumeso enu anweba bonse! Amena. Bino bintu byatangila palutwe kukila byo tulanguluka, lekai Nkambo atwajijila na kwishinikisha Ayemwine, Kashinde Wabulume mukatampe, awa Lukunwa wakwa Abulahama. . . Bino nobe Abulahama, Aye wikyubijile kwi Abulahama, kimye kimo; apo ipo po

ekyoonawile, kabiji wikyubile jibiji. Abulahama kimye kyonse watwajijiletu na kuketekela Lesa.

¹⁶² Obewa kechi uji muno na mambo a obewa mwine ne. Obewa waimeko muntu mukwabo, kabiji ao ke inetu. Ke nyenga yobe. Kabiji inetu wamvwetwa na kivule kya lufu. Kabiji ubena kumanama na—na kikola kya shunga. Kabiji kechi wafuma kuno ne. Wafuma ku. . . Wafuma ku Louisiana, ke kyaalo kya bisensa. Akyo. . . Kabiji kujipo kintu kikwabo, akyo jibumba kyo bafwainwa kuyuka. Obewa uji mwaana wamukazhi wakolwa bingi, ao ubena kwinegezha kutanwa ku ino mbung'eno, kabiji uji na kanshita. Akyo kyakine. Akyo kyakine. Kechi ibyo nyeni? Bushe mwaketekela pano nyi? [Aye nyenga waamba mba, “Ee. Amena.”—Waku.] Inge obewa wi Lukunwa wakwa Abulahama, kiswe ne kulupuka, kabiji tambula lubuko mu Jizhina ja Yesu Kilishitu.

¹⁶³ Mwaketekela nyi? Kyakine. Vulukai, ke mulaye Wanji. Aye waambile mba Ukeyyuba. Aye ulama mulaye Wanji.

¹⁶⁴ Muji byepi? Twibenyi umo ku mukwabo. Amiwa kechi nakuyuka ne. Bino Lesa wakuyuka. Mwaketekela mba inge Lesa wakonsha kumbuula lukatazho lweni, nanchi mwayuka mba kyafwainwa kufuma mu bulume bwa bumupashi. Pano, kujitu bintu bibiji kobyafwaina kufuma, byomwafwainwa kulanguluka. Umvwe kyaubiwa, kyakila pa kulondolola, mambo ke kintu kyakukumya. Kabiji, ne apo, ke kyakukumya; kintu kimo, kyawama, kechi kyakulangulukapo ne, bino kasa kiji kya bukine. kyafwainwa kwikala kyakukumya. Kabiji pano anweba mwikiyuka, kana kya bukine nangwa ine, anweba mukayuka kana Aye wimwambila kya bukine.

¹⁶⁵ Pano, vulukai, Amiwa kechi nakuyuka ne. Kyafwainwa kwikala Muntu mukwabo wapusanako ne amiwa. Inge wauba pamo nobe ba Faliseo, ne kwamba mba, “Oo, ke mupashi watama,” apa nishi uji na fweto. Inge waketekela mba ye Kilishitu, uji na fweto Yanji. Ene mambo o mwakonsha kwikiketekela, mambo Aye wikalile kwikala kya jino juba, kabiji kechi kyakyubiwapo kufuma ku kyokya kimye kufika kino ne. Akyo kikiilenga kwikala ke kimye kyakupelo.

¹⁶⁶ Kuji muntu umo ubena kumwekanyika kulutwe nkobe, kimye kyonse. Ke mwanamulume, wa muntwe-watokoloka. Ke mulume obe. Waikala ponkapo. Aye ubena kweseka kuswa lubuko lwanji, byo amvwetwa na kikola kya kaasa, kitumbwambwa, kaasa. Uji na lukatazho lwa jifyo, lukatazho lwa kisukwilo. Anweba mwi ba Mr. ne Mrs. Little. Abo ibyo nyi? [Aye nyenga waamba mba, “Ee.”—Waku.] Ketekelai na muchima wenu yense, kabiji ntambulai lubuko.

¹⁶⁷ “Mwaamba mba janji, jizhina jabo?” Kika, kyakine. Bushe Yesu kechi wabuujile Petelo mba, “Jizhina jobe wi Shimona, mwaana Yona?”

168 Uno mwanamulume. Twibenzi ku umo ne mukwabo, mwane. Amiwa kechi nakuyuka ne. Bino obewa wi mwanamulume, nobe—nobe Petelo waishilenga kwi Nkambo Yesu, atweba twaiya pamo. Bushe mwaketekela mba amiwa ne kalume Wanji nyi? Bushe mwaketekela mba kyo Nemubuula kya bukine nyi? [Aye mulongo waamba mba, “Ee, mwane. Byonji, mwane.”—Waku.] Inge mwakonsha kwikiketekela! Amiwa, inge pajipo kintu kimo kyo Nakonsha kuuba, Nakonsha kwikyuba, bino kafwako nangwa kimo kyo Nakonsha kuuba ne. Aye wikyuba kala; ke kintutu kya kukwasha obewa kwikiketekela. Kabiji, monai, kechi kyakonsha kwikala amiwa ne. Inge kyajinga amiwa, Nakonsha—Nakonsha kuuba kyonse kyo Nakonsha kwimubila. Bino Aye wampele kya bupe, kabiji Amiwa nkokolokatu amiwa ku meso Anji, kabiji Aye ye wamba. Mwaketekela kyokyo nyi? [“Ee.”]

169 Mwaketekela kyokyo nyi, jibumba?

170 Nakukebanga kutana muntu. Obewa uji na bintu byavula byatama. Bino kimo kya mu byobyo bintu ke, kitumbwatumba kya pa jiso jobe ja kilujo. Alo lo lwine lukatazho. Akino ke kintu kikwabo, mwanamukazhi watwajijila na kumweka kuno. Ke mukazhi obe. Mwaketekela mba Lesa wakonsha kumbula kyatama ku mukazhi obe nyi? Lukatazho lwanji luji mu kanwa kanji. Ke meeno anji. Abyo ibyo. Bushe mwaketekela mba Yesu umotu yenka, Ao wayukile Shimona Petelo byo ajinga, wakonsha nkumbula byo uji? [Aye mulongo waamba mba, “Ee.”—Waku.] Bushe kyakonsha kukulengela kwikala na luketekelo lukatampe nyi? [“Ee, mwane.”] Kyakonsha nyi? [“Ee.”] Oscar Barnes. [“Abyo ibyo.”] Abyo ibyo nyi? Yainga kunzubo kwenu, ikalai babukwa.

171 [Kafwapo bijipo pa tepu ne—Waku.] . . . mweenyi kwi obewa. Amiwa kechi nakuyuka ne, bino Lesa wakuyuka. Mwaketekela mba Aye wakonsha kumbula lukatazho lwenu nyi? Mwakonsha kwikiketekela na muchima wenu yense nyi? Lukatazho lobe luji pashingo, kabiji ne mu kyanji kyobe muno. Ke—ke kikupa kyabola. Ubena kwikala na byavimba, nobe, mifumba mukachi ka kikupa. Abyo ibyo. Obewa kechi wafuma kuno ne. Obewa uji mu—mu muzhi muji ma olingi kuzhokoloka. Waikala mu kipachiko, na mwekelo ya mitumba yazhokoloka kunyuma yanji. Kuji hotela watelwa mba Antlers. Ke San Bernardino. Ako koko wafuma obewa. Bwela yanga, Yesu Kilishitu wakukosesha, inge wafwainwa kuketekela.

172 Kujitu kintu kimo kyakonsha kubuka kaasa, awa ke Lesa. Mwaketekela mba Aye usa kwi mubuka nyi? [Aye mulongo waamba mba, “Amiwa kine naswa.”—Waku.] Mwikiketekela! Yanga, kabiji lekai aye Nkambo Lesa emulenge kwikala mwabukwa mubiji yense.

173 Katataka anweba mwajinga kyaki-. . .mwakilamo lubazhibazhi, kyalubakana bingi. Monkamwe mu lubazhibazhi,

munda mobe mwalenga kwikala mwatama. Kajo nkobe munda kechi kasungululwa ne; wikaleta mukanwa nkobe. Mwayulatu asindi mukanwa nkobe. Mukimye kya mabaanga, wikala wankokelela bingi ne bintu byonse. Uji na bilonda munda mobe. Mwaketekela mba Yesu Kilishitu wakonsha kukubula kyokyo nyi? [Aye nyenga waamba mba, “Ee.”—Waku.] Yanga ukaje kajo kobe kamulajilo, nanchi. Ketekelai na muchima wenu yense, Yesu Kilishitu wi mukosesha.

174 Muji byepi? Kuji bintu byavula byatama. Bino kintu kimo kyo uji nakyō na moyo, ke bulema bukeya na kikola kya mashimba. Bino waketekela mba Lesa usa kwi mubuka, ne kwimulengela kwikala bulongo nyi? [Aye nyenga waamba mba, “Ee.”—Waku.]

175 Nkambo Yesu, Nalomba mba Anweba musa kwikiswisha ku nyenga yami. Mupai meso anji. Mfumyai lukatazho lwa inetu kwi aye, kabiji ne kulenga kikola kya mashimba kwikala bulongo, mwi Yesu mu Jizhina. Amena.

176 Yanga pano, ketekelai. Aye ukeyyuba, kabiji kisakwikalatu bulongo. Kechi muzhinauke ne, twajijilaitu na kwenda, kabiji ketekelaitu na muchima wenu yense.

177 Lukatazho lwa muchima ke kintu kyatama, bino Kilishitu ubuka muchima. Mwaketekela kyokyo nyi? [Aye nyenga waamba mba, “Ee.”—Waku.] Yanga, kiketetekelai, kabiji byonse bikobiwa. Kyapwa.

178 Mwaketekela mba musa kwikala kilema? Ine, Ne amiwa kechi nalanguluka byobyo, ne apo ne. Milanguluko yami, kikola kya mashimba; akya kivule popa, oo, awa ke kaasa. Bushe mwaketekela mba Aye usa kwikibuka nyi? [Aye nyenga waamba mba, “Ee, Naswa.”—Waku.] Yanga, kiketetekele. Aye usa kukupa bututulu bwa mubiji.

179 Kyakupa kijikila pa kimye kyabaya, kushika kwa muchima. Bino mwaketekela mba kisakupwa, bufuku buno nyi? Yanga, kiketetekele, Yesu Kilishitu wakubuka.

180 Paji lukatazho lucheche, kufuma ku lukatazho lwa bainetu, pa kimye kyabaya. Kabiji pano, obewa uji, kikala kintu kyakonsa pakuuba mba ubuke bimye bimo. Wikala wakosakana, mu mbavu yobe. Kechi wakonsha kwenda ne, poso juba jakoma, kimye. Ke kikola kya mashimba. Yanga, kechi wikale na luzhinauko ne, kechi ukekalapo nakyō jikwabo ne. Ketekelaitu, na muchima obe yense.

181 Uji na bintu byavula, byalubakana. Bino kintu kimo kibena kukupa milanguluko yabaya bingi, ne obewa ulanguluka pa mashimba, abyo byokiji, kukulenga kwikala kilema. Mwaketekela mba Aye usakwimulengela kwenda ne kwikalatu bulongo? [Aye nyenga waamba mba, “Ee, mwane.”—Waku.] Yanga, kiketetekele na muchima obe yense, Yesu Kilishitu usakukulengela kwikala bulongo.

182 Lubazhibazhi lwa muchima, kabiji ne kikola kya mashimba, bino mwaketekela mba Lesa usa kwi mulengela kwikalatu bulongo nyi? Mwaketekela nyi? Yanga, kabiji lekai Nkambo Yesu akulenge wikale bulongo.

183 Amwa munda kine mwakupa lukatazho mu myaka icheche yapelako, ibyo nyi? Kechi kikatwajijila jibiji ne. Yanga, kiketeekele. Lesa akupeshe. Wabukwa.

184 Wakonsha, ne obewa, munda mobe mwabukwa. Yainga, ketekelai na muchima wenu yense. Kuzhinauka ne.

185 Wajinga na kimye kyakosa pakuuba mba apeme, akya kikola kya asima kipwisha bingi ngovu, kechi byo kyuba nenyi? Bushe mwaketekela mba kisakubiwa pano nyi? [Aye mulongo waamba mba, "Ee."—Waku.] Kijitu bulongo, yanga kiketeekele. Amena.

186 Aleluya! Bushe mwaketekela na muchima wenu yense nyi?

187 Pa kakimyetu kacheche. Kechi mubena kumona kyokya Kyeya popa? Inetu mucheche wachiluluka ubena nkutala, waikala paapo, uji na kitumbwa ku lubaji lwanji lwa kipiko. Uji na lukatazho lwa jifyo, byalubakana. Obewa wajinga na lwitabilo lwabaya. Obewa kechi wafwainwa kwiya kuno ne. Kyapwa. Ketekelaitu. Amena. Ikalai na lwitabilo mwi Lesa!

Mwaketekela kyokyo nyi?

188 Bushe waketekela, nyenga, usakukasuluka ku lukatazho lwa longololo, waikala popa? Mwaketekela mba Aye usa kwi mulengela kwikalatu bulongo nyi? Oke. Kechi muzhinauke ne, kabiji mwakonsha kwikitambula inge mwakonsha kwikiketekela.

189 Awe mwanamulume waikala papo, ubena nkutala, umanyikwa na kikola kya kaasa wa banabalume, kubuuka buka mu kimye kya mafuku ne bintu bikwabo. Mwaketekela nyi, mwane? Kikekala kyapwa, nanchi, inge mwikitabila.

190 Apo paikala mwanamulume wachiluluka, ubena nkutala. Aye wakatazhiwa na kashita. Aye kabiji ubena kukeba lubatizhilo lwa Mupashi Wazhila. Imana, mwane, swa lubuko lobe. Lekai Lesa emupe lubatizhilo lwa Mupashi Wazhila. Amena.

191 Waikala kulutwe kufuma kwi obewa, paji mwananyike waikala popa, awa nanji uji na kashita, kijitu pamo nobe kupungila kwa pakimye pa kimye, waikala popa, ku lubaji lukwabo. Bushe mwaketekela mba Lesa usa kubuka mwaana, popo? Mwaketekela na muchima wenu yense nyi? Nanchi Lesa usa kumubuka mwaana.


192 Bushe mwaketekela, anweba bonse nyi? Kechi—kechi ke Aye—kechi Aye kine ke Lukunwa wakwa Abulahama Wazhila nenyi? Bushe Aye kechi Kashinde Wabulume nenyi? Bushe Aye walaile mba ukangata nsakwa ya balwanyani?

¹⁹³ Baanga ba mwi anweba bakaswa, baumvwa kinemenezhi kya mulwanyi? Sutulaiko maboko enu, anweba mumvwa kinemenezhi kya mulwanyi, kabiji anweba mwi Lukunwa wakwa Abulahama, sutulaiko maboko enu *bibye*. Ambai mba, “Mulongo Branham, Amiwa nakatazhiwa na lubazhibazhi.” Oo, kuji pepi nobe eite paseti wa mwi anweba baji byobyoyo. Ambai mba, Ami...Ke janema bingi pano, jibumba jonse jaikala janemenwa nobe mukaka mukatampe, kibena kundengela pepi kwikala mpofu, ako komuji anweba.

¹⁹⁴ Kechi mwamona ne, amba muno muji tweti nangwa sate, kapepo, makatazho, nangwa kukilapotu, ponka pano pa uno pulatifomu kabiji ne mujibumba, amba Lesa kechi ukakalwa ne? Ke Yesu Kilishitu ujitu pamo keesha, leelo, ne myaka yonse. Bushe mwaketekela kyokyo nyi? [Kipwilo kyaamba mba, “Amena.”—Waku.] Pano kika, yense Lukunwa wakwa Abulahama, kika kyo wabujila kutambula kii? Awa Kashinde mukatampe, aye wimushijiileye, uji kuno. Aye washinikisha mba uji pano. Bushe mwamuketekela Aye?

¹⁹⁵ Nanchi pano tolai kii wa lwitabilo, fikaipo na maboko enu, ne kwamba mba, “Yesu Kilishitu, Naketekela ku lubuko lwami, ponka pano.” Imanai ponka pomuji. Sutulaiko maboko enu, nshikulai lwitabilo lwenu pano. “Naketekela, Nkambo Yesu. Naketekela ponka pano.”

¹⁹⁶ Pano bikai maboko enu umo pa mukwabo. Bikai maboko enu umo pa mukwabo, Lukunwa mukwabo wakwa Abulahama. Pano lombelelai awo muntu. Bikai maboko enu pe abo. Yesu waambile mba, “Abye biyukilo bikebalondelanga baitabila. Umvwe babika maboko abo pa bakolwa, bakakosa.”

¹⁹⁷ Satana, washindwa mu iye nkondo. Mujizhina ja Yesu Kilishitu, mfumai muno, kabiji abo bantu lekai bayenga, konka kulukumo lwa Lesa. 

64-0207 Mushakulu Abulahama
Bibaza bya Kern County
Bakersfield, California U.S.A.

KAONDE

©2025 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Kayukilo ka kuvuzha

Luusa lonse luji kubene. Awe buuku mwakonsha ku mupulita ku kya kupulitako kya pa nzubo pakuuba mba anweba bene mwakonsha kumwingijisha nangwa kupaanwa, kyatuutu, nobe jishinda ja kunsampwilamo Mambo awama a Yesu Kilishitu. Awe buuku kechi wakupotesha ne, kulengamo avula, kutumwa palubesha, kufiwa mu makopyuta, kututululwa mu milaka ikwabo ne, nangwa kwingijisha mukumwenamo mali kwakubula kuswisha kwanembwa kufuma kuba Voice Of God Recordings®.

Pakukeba kuyukilapo bikwabo nangwatu mabuuku akwabo, mwane tumai pa:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org